

---

**PWYLLGOR CRAFFU GOFAL**  
**03/04/2025**

---

**Presenoldeb:**

**Y Cynghorwyr:**

Beth Lawton (Cadeirydd), Jina Gwyrfai, Elwyn Jones, Eryl Jones-Williams, Sian Williams, Rheinallt Puw, Gwynfor Owen, Menna Baines, Gareth Coj Parry, Berwyn Parry Jones a Anwen J. Davies

**Swyddogion yn bresennol:**

Llywela Haf Owain (Uwch Ymgynghorydd Iaith a Chraffu), Iwan Edwards (Swyddog Gwasanaethau Democratiaeth).

**Yn bresennol ar gyfer eitem 5:**

Y Cyngorydd Paul Rowlinson (Aelod Cabinet Tai ac Eiddo), Carys Fon Williams (Pennaeth Adran Tai ac Eiddo), Hedd Morlais Glyn Tomos (Pennaeth Cynorthwyol Adran Tai ac Eiddo) a Sion Elwyn Hughes (Uwch Swyddog Gweithredol Tai ac Eiddo)

**Yn bresennol ar gyfer eitem 6:**

Y Cyngorydd Dilwyn Morgan (Aelod Cabinet Oedolion, Iechyd a Llesiant) ac Aled Davies (Pennaeth Adran Oedolion, Iechyd a Llesiant), Dylan Owen (Cyfarwyddwr Statudol Gwasanaethau Cymdeithasol), Mannon Emyr Trappe (Pennaeth Cynorthwyol Diogelu, Sicrwydd Ansawdd, Iechyd Meddw a Diogelwch Cymunedol),

**Yn bresennol ar gyfer eitem 7:**

Y Cyngorydd Dilwyn Morgan (Aelod Cabinet Oedolion, Iechyd a Llesiant), Menna Trenholme (Dirprwy Arweinydd ac Aelod Cabinet Plant a Chefnogi Teuluoedd), Dylan Owen (Cyfarwyddwr Statudol Gwasanaethau Cymdeithasol), Aled Gibbard (Pennaeth Cynorthwyol Plant a Chefnogi Teuluoedd) a Lucy Hemmings (Arweinydd Ymarfer Awtistiaeth Plant a Chefnogi Teuluoedd).

**1. YMDDIHEURIADAU**

Derbyniwyd ymddiheuriadau gan y Cynghorwyr Angela Russell, Linda Morgan, Meryl Roberts a Einir Wyn Williams

**2. DATGAN BUDDIANT PERSONOL**

Derbyniwyd datganiad o fuddiant personol gan y Cyngorydd Gwynfor Owen ar eitemau 6 a 7. Fe adawodd y cyfarfod am yr eitemau yma.

**3. MATERION BRYD**

Dim i'w nodi.

**4. COFNODION**

Llofnododd y Cadeirydd gofnodion y cyfarfod blaenorol o'r pwyllgor hwn a gynhaliwyd ar 20 Chwefror, 2025 fel rhai cywir.

## 5. CYNLLUN GWEITHREDU TAI

Cyflwynwyd - adroddiad gan yr aelod cabinet dros Dai ac Eiddo yn rhoi diweddariad ar gynnydd y Cynllun Gweithredu Tai. Esboniwyd fod cynyddu cyflenwad o dai i bobl leol, sicrhau nad oes neb yn ddigartref yng Ngwynedd ac ymdrin â'r argyfwng costau ynni a thlodi tanwydd yn flaenoriaeth o fewn Cynllun y Cyngor. Eglurwyd fod y Cynllun bellach hanner ffordd drwy ei fywyd ac felly ei fod yn amserol i roi diweddariad i'r Pwyllgor ac i adolygu'r cynllun.

Cyfeiriwyd at adran tri o'r adroddiad sydd yn cynnwys crynodeb byr o faterion allweddol y cynllun a thabl sydd yn rhoi trosolwg o brif ffigyrau cynnydd y Cynllun. Eglurwyd mai'r nod, yn gyffredinol, oedd darparu 1,966 o unedau a bellach mae dros 830 wedi eu cwblhau - sydd yn 42% o'r nod. Yn ogystal, nodwyd fod hyn wedi helpu 15,500 o unigolion o Wynedd. O ran gwario'r gyllideb o 152 miliwn, cadarnhawyd eu bod wedi gwario dros 60 miliwn. Credwyd fod y ffaith eu bod bron wedi cyflawni hanner y cynllun yn dangos yn bendant eu bod ar y trywydd iawn.

Cydnabuwyd fod y Cynllun wedi wynebu heriau ar hyd y daith e.e. dwy flynedd gyntaf y Cynllun o ganlyniad i sgil-ffeithiau'r pandemig a 'Brexit'. Yn ogystal, esboniwyd tra eu bod wedi llwyddo i brynu tai yn gyflym, mae'r adnewyddu wedi cymryd mwy o amser na'r disgwyl oherwydd diffyg adnoddau a chontractwyr. Ar ben hyn, mae cyfraddau llog, costau adeiladu a chostau byw i gyd wedi cynyddu'n sylweddol ers dechrau'r Cynllun. Er hyn, pwysleisiwyd eu bod yn ffyddiog bod prosiectau'r Cynllun ar drac i gyflawni'r uchelgais a osodwyd ar ddechrau'r Cynllun ac o fewn y cyfnod amser.

Rhoddwyd cyflwyniad gweledol ar 'Powerpoint' yn dangos beth yw cynnydd ac effaith y cynllun hyd yn hyn. Eglurwyd fod pum maes i'r Cynllun. Y cyntaf yw sicrhau fod neb yn ddigartref yng Ngwynedd. Eglurwyd fod y Cyngor yn ceisio helpu pobl ddigartref Gwynedd drwy agor mwy o lety a darparu mwy o gefnogaeth. Fel enghraifft, dangoswyd llun o lety sydd bellach wedi gorffen cael ei adeiladu yn Nolgellau yn 2023 ac wedi'i adeiladu gan ddefnyddio cerrig yr hen ysgol. Soniwyd fod yr adeilad wedi'i restru ar gyfer Gwobrau 'Inside Housing' llynedd.

Adroddwyd hefyd fod bwriad i addasu'r hen Adeilad y Goron yng Nghaernarfon er mwyn creu hyd at 40 o fflatiau hunangynhaliol llety a chefnogaeth. Eglurwyd fod yr adeilad wedi'i brynu ym mis Mawrth 2024 a bod y pensaer wrthi'n gwneud y dyluniadau terfynol. Soniwyd fod bwriad i drefnu ymweliad i Aelodau yn yr wythnosau nesaf iddynt gael y cyfle i fynd o gwmpas yr adeilad.

Cyflwynwyd yr ail faes, sef cynyddu'r cyfleoedd i gael tenantiaeth fforddiadwy gan gyfeirio at gynllun cefnogi'r rhaglen adeiladu tai cymdeithasol, sydd o fewn y maes yma. Nodwyd eu bod yn cydweithio gyda phartneriaid, y Cymdeithasau Tai, i godi tai fforddiadwy ar draws y sir ac yn rheoli Grant Tai Cymdeithasol Llywodraeth Cymru trwy flaenoriaethu'r Rhaglen Adeiladau.

Soniwyd fod cynlluniau tai gwag yn dyrannu grantiau a benthyciadau i ddod a thai gweigion yn ôl i ddefnydd. Nodwyd fod cynnydd mewn costau adeiladau wedi achosi newid yn y cynllun yma gyda grantiau o hyd at £20,000 nawr ar gael, i fyny o £15,000 ar ddechrau'r cynllun. Yn ogystal, eglurwyd fod y cynllun hefyd wedi'i addasu er mwyn sicrhau ei fod ar gael i fwy o bobl.

I gloi'r cyflwyniad, rhoddwyd trosolwg ar y gyllideb ychwanegol fydd ar gael i'r cynllun wrth symud ymlaen. Esboniwyd bydd y premiwm ychwanegol yma yn cael ei ddyrannu i'r pum maes gwahanol o fewn y cynllun, e.e. £2.7 miliwn ychwanegol i Lety a Chefnogaeth a £2.1 miliwn i Fân-ddaliadau.

Rhoddwyd cyfle i'r aelodau ofyn cwestiynau a chynnig sylwadau.

Gofynnwyd cwestiwn ynglŷn â'r cynllun i addasu Adeilad y Goron yng Nghaernarfon sef ble fydd tenantiaid yr adeilad yn parcio. Mewn ymateb, eglurwyd fod yna faes parcio dau lawr dros y ffordd i'r adeilad a fydd ar gael i denantiaid yr adeilad.

Holwyd os yw cwmni 'Adferiad' yn rhywbeth i wneud efo 'Tŷ Adferiad' ym Mhorthmadog ac a oes posib cael mwy o fanylion am 'Tŷ Adferiad'. Mewn ymateb, nodwyd:

- Ei bod yn fwy na pharod i gael trafodaeth un i un gyda'r aelod i egluro yn union be sydd yn digwydd 'Tŷ Adferiad' a gwahoddwyd yr aelod i ymweld â'r safle . Pwysleisiwyd ei fod yn gynllun ardderchog.

Nododd yr aelod nad oedd wedi gweld rhywbeth yn y Cynllun yn cyfeirio at helpu pobl a oedd yn cael trafferthion talu morgeisi. Credwyd y byddai ychydig o gymorth i'r bobl yma yn rhwystro'r trafferthion ac yn helpu i leihau'r galw am dai yn y sir.

Mewn ymateb, nodwyd:

- Ei fod yn rhywbeth mae awdurdodau lleol wedi bod yn edrych arno yn genedlaethol. Esboniwyd bod gan Lywodraeth Cymru becyn achub morgeisi ac mae'r adran yn cyfeirio pobl at wahanol asiantaethau sydd yn medru rhoi cymorth ond nid oes ganddynt gynllun penodol i helpu gyda morgeisi.

Cyfeiriodd yr aelod at bwynt 3a o'r adroddiad sef Cynllun Tŷ Gwynedd gan nodi ei bryder gyda chynnydd y Cynllun. Nodwyd nad oes datblygiad sylweddol wedi bod gyda'r tri safle hyd yn hyn, a dim ond £360,000 sydd wedi'i wario o'r £9 miliwn o gyllideb. Cyfeiriwyd at ddatblygiad arall ym Mangor gan Gymdeithas Tai a ganiatâwyd o gwmpas yr un amser. Nodwyd fod y stad Cymdeithas Tai bellach wedi ei adeiladu a bod pobl yn byw ynddynt erbyn hyn. O ganlyniad i'r pryder nododd yr hoffai weld adolygiad o'r cynllun.

Mewn ymateb, nodwyd:

- Eu bod yn hapus i rannu'r model a'r costau gyda'r Pwyllgor yn ei gyfanrwydd er mwyn i'r aelodau gael gweld y gwahaniaeth rhwng y Cynllun Tŷ Gwynedd a datblygiadau Chymdeithasau Tai.
- Derbyniwyd fod cynnydd yn y datblygiadau wedi bod yn araf. Esboniwyd fod problemau gydag isadeiledd, draeanau ac ynni wedi cyfrannu at yr oedi yma. Er hyn, nodwyd ei fod yn brosiect sydd yn boblogaidd iawn a gyda diddordeb sylweddol gan bobl i brynu tai drwy'r cynllun. Soniwyd eu bod nhw dai newydd, braf, gynaliadwy ac yn defnyddio ynni effeithiol.

Gofynnwyd a fyddai'r r adran yn fodlon ail edrych ar y Cynllun Tŷ Gwynedd er mwyn cael sicrwydd ei fod yn rhywbeth y dylai'r Cyngor wneud ac os yw'n werth yr arian. Mewn ymateb, nododd yr aelod cabinet tai ac eiddo:

- Ei fod yn hapus i drafod y Cynllun efo'r Pennaeth adran a gweddill y Swyddogion i ystyried y pwyntiau a godwyd.

Mynegwyd pryder gyda thai gwag yng Ngwynedd. Gofynnwyd a fyddai'r Cyngor yn ystyried cyflogi gweithwyr ei hunain i wneud gwaith mewn ardaloedd ble does dim contractwyr ar gael. Mewn ymateb, nodwyd:

- Bod yr adran wedi defnyddio gweithwyr mewnol ble maent wedi dod a thai gwag yn ôl i ddefnydd. Soniwyd y byddai yn rhywbeth gall yr adran ystyried yn y dyfodol. Holwyd am eglurhad ar y Cynllun Tai Gwag, yn benodol os mai blwyddyn o brofiant yr ewyllys sydd angen i fod yn gymwys ar gyfer yr eithriad. Ymhellach, nodwyd fod 123 o eithriadau wedi cael eu cymeradwyo yn chwarter olaf blwyddyn ddiwethaf a holwyd sut mae hyn yn cymharu i'r cyfnod cynt. Ar ben hyn, gofynnwyd a yw'n realistig i ystyried estyniad i'r flwyddyn mae pobl yn cael i gyflawni'r gwaith adfer. Mewn ymateb, nodwyd:
  - Bod y Cynllun Tai Gwag yn un poblogaidd iawn.
  - O ran faint o eithriadau sydd wedi cael eu cymeradwyo dros gyfnod y cynllun, soniwyd bod y nifer wedi bod yn eithaf cyson. Cadarnhawyd y byddai'n ceisio cael y ffigyrau pendant a'i adrodd yn ôl i'r pwyllgor.
  - Cadarnhawyd y byddai'r adran yn edrych ac ystyried estyniad i'r 12 mis mae pobl yn cael i gyflawni gwaith adfer.

Llongyfarchodd yr Aelod yr Adran am ei gwaith gwych, yn enwedig gyda'r maes Tai Teg ble mae'r adran dros ei tharged yn barod ac wedi gwario chwarter y cyllid. Holwyd os fydd cynlluniau i osod targedau newydd a pharhau'r pethau sydd yn gweithio yn dda yn y cynllun presennol. Mewn ymateb, nodwyd:

- Bydd y cynllun yn estyn am ddwy flynedd a bydd y targedau yn cael eu haddasu hefyd, felly ni fydd y targedau gwreiddiol yn parhau.

Holwyd os yw'n bosibl casglu data am ymgeiswyr sydd yn siarad Cymraeg er mwyn monitro'r sefyllfa yn y dyfodol. Mewn ymateb, nodwyd:

- Bod yr adran yn derbyn cyngor cyfreithiol ar hyn o bryd o ran yr elfen ieithyddol yn y polisi gosod tai a bod trafodaethau yn parhau. Soniwyd eu bod wedi mynd i'r eithaf posib o ran yr elfen gosod i bobl leol a beth sydd yn bosib i'r adran wneud. Tynnwyd sylw at 1ch o'r adroddiad sef y pecyn landlordiaid preifat ac i 3ng sef y prosiect Helpu i Werthu'n lleol. Gofynnwyd am ddiweddariad ar gynnydd y ddau brosiect yma. Mewn ymateb, nodwyd:
  - Bod y cynllun Pecynnau Cefnogaeth i Landlordiaid Preifat yn un poblogaidd iawn a bod hi'n braf cael adrodd fod y cynllun wedi rhoi cymorth i 64 o unigolion hyd yn hyn.
  - Eglurwyd fod Cyngor Gwynedd yn un o'r cynghorau sydd gwneud y defnydd mwyaf o'r Pecynnau dros Gymru gyfan.

Nododd yr Aelod ei fod yn cynrychioli ardal eithaf gwledig ac yn gweld o'r cynlluniau fod y datblygiadau dan sylw mewn ardaloedd mwy poblog. Gofynnwyd os yw'r adran yn ystyried cymunedau mwy gwledig ar gyfer y datblygiadau. Nodwyd y byddai o fudd i ysgolion bychain ble mae'r niferoedd yn disgyn. Mewn ymateb, nodwyd:

- Bod yr adran yn ystyried pob cymuned yng Ngwynedd ac yn ceisio sicrhau fod y cyflenwad tai yn cyfateb i'r angen am dai.

Nodwyd fod niferoedd digartrefedd yn parhau i fod yn uchel a gofynnwyd a yw'r galw yn amrywio ar draws y sir. Mewn ymateb, nodwyd:

- Bod y galw am dai yn amrywio ar draws y sir ond nad oes unrhyw ardal yn y sir ble nad oes dim galw mawr am dai

Nodwyd fod problem mawr gyda tan-feddiannaeth yng Ngwynedd gyda dros 1,000 o bobl yn byw mewn tai efo mwy o ystafelloedd gwely nag ystyrir yn angenrheidiol. Holwyd

os oes rhywbeth gellir ei wneud i gymell bobl i symud i dai mwy addas. Mewn ymateb, nodwyd:

- Nad yw'r Cyngor yn medru gorfodi pobl i symud o'i tai ond fod gwaith yn cael ei wneud i drio perswadio pobl i symud i dai fwy addas. Eglurwyd fod hyn yn helpu'r bobl fydd yn symud gan nad ydynt wedyn yn gorfod talu treth llofftudd a y mae'n rhyddhau'r tai i deuluoedd sydd wir angen mwy o le.

## **PENDERFYNIAD**

### **a) Derbyn yr adroddiad**

- b) Gofyn i'r aelod cabinet ail edrych ar y cynllun Tŷ Gwynedd er mwyn ystyried os yw'n darparu gwerth am arian ac a ddylid buddsoddi'r arian mewn prosiect arall o fewn y Cynllun Gweithredu Tai.**

## **6. GWASANAETH IECHYD MEDDWL GWYNEDD**

Cyflwynwyd adroddiad gan yr aelod cabinet dros Oedolion, Iechyd a Llesiant yn rhoi diweddariad ar gynnydd y model waith newydd y Gwasanaeth Iechyd Meddwl. Nodwyd fod adroddiad wedi ei gyflwyno i'r pwyllgor nol ym mis Mehefin 2023 gyda chynlluniau i ddod a'r Tîm Integredig gyda'r Bwrdd Iechyd i ben a chreu model gwaith newydd. Esboniwyd fod y Gwasanaeth Cymdeithasol Iechyd Meddwl wedi'i sefydlu ym mis Mai 2024 ac mae'r gwasanaeth wedi bod yn gweithredu ers bron i flwyddyn erbyn hyn.

Nodwyd bod sefydlugwasanaeth o'r newydd yn golygu fod gweithwyr cymdeithasol iechyd meddwl a gyflogir gan y Cyngor yn darparu gwasanaeth iechyd meddwl a chymdeithasol o fewn y gymuned gan ganolbwyntio ar beth sy'n bwysig i'r unigolyn ac ar adferiad. Soniwyd fod y gwasanaeth bellach yn cyfarch dyletswyddau statudol y Cyngor ac yn canolbwyntio ar y bedair elfen o'r ddeddf Gwasanaethau Cymdeithasol a Llesiant.

Eglurwyd fod y timau wedi'i rannu i ardaloedd Arfon a De Gwynedd gyda'r tîm Arfon wedi'i leoli yn Pencadlys a'r tîm De Gwynedd wedi'i leoli yn safle Galw Gwynedd. Dywedwyd bod lleoli y swyddfeydd yn y Cyngor wedi bod yn gam cadarnhaol gan fod hyn yn gwneud cyd weithio gyda gwasanaethau eraill yn yr adran a'r Cyngor yn llawer haws. Nodwyd fod y tîm yn cyflogi dau uwch weithwyr ar gyfer y gwasanaeth ac fod y buddsoddiad sylweddol yma wedi bod yn allweddol i sicrhau bod y gwasanaeth mewn sefyllfa i gyfarch anghenion unigolion yn amserol.

Adroddwyd fod Arolwg Cenedlaethol Cymru wedi datgan bod disgwyl gweld cynnydd mewn achosion anhwylder iechyd meddwl cyffredinol fel gorbryder ac iselder rhwng rŵan a 2040. Yn ogystal, nodwyd fod yr arolwg yn dangos fod gostyngiad cyffredinol mewn llesiant meddyliol a bod yr angen am gefnogaeth yn debygol o gynyddu. Nodwyd fod astudiaeth hefyd yn dangos fod mwy o bobl ifanc wedi profi mwy o bryder ers y pandemig COVID. Eglurwyd fod 439 o unigolion yn agored i'r gwasanaeth ar hyn o bryd.

Soniwyd eu bod wedi cynnal sawl cyfarfod i ymgynghori a'r gweithlu i drafod y ffordd orau ymlaen i ail fodelu'r gwasanaeth. Nodwyd bod y gweithlu yn allweddol i sicrhau bod gweithdrefnau cadarn yn ei lle ar gyfer y gwasanaeth newydd. Dywedwyd hefyd eu bod wedi rhoi cyfle i Uwch Rheolwyr Betsi Cadwaladr i roi mewnbwn ond ni dderbyniwyd ymateb.

Nodwyd eu bod hi'n agosáu at flwyddyn ers i'r gwasanaeth agor felly mae bwriad i anfon holiaduron i unigolion sydd wedi neu yn parhau i dderbyn cefnogaeth gan y gwasanaeth. Esboniwyd y bydd y canfyddiadau yma yn llywio datblygiad y gwasanaeth ac mae gwybodaeth anegdotol yn nodi bod unigolion yn teimlo ei bod hi'n hawdd cysylltu â'r gwasanaeth a bod modd cael asesiad yn fuan. Teimlwyd fod ail fodelu'r gwasanaeth wedi cael effaith gadarnhaol iawn ar lesiant staff yr adran ac maent yn teimlo fod person yn dod gyntaf yn lle'r broses, ac yn teimlo eu bod yn perthyn i'r Cyngor.

Rhoddwyd cyfle i'r aelodau ofyn cwestiynau a chynnig sylwadau.

Nodwyd fod y nifer o asesiadau gofalmwr yn 12 a holwyd os yw'r niferoedd yma yn isel o feddwl fod 439 o achosion yn agored. Fel ail gwestiwn, gofynnodd yr aelod pa ymgynghoriad a wnaed gyda defnyddwyr y gwasanaeth cyn ail fodelu. Mewn ymateb, nodwyd:

- Eu bod yn cydnabod fod y nifer o asesiadau gofalmwr yn isel a bod gwaith yn mynd ymlaen ar hyn o bryd i drio cynyddu'r niferoedd.
- Nad oeddent wedi ymgynghori â defnyddwyr y gwasanaeth ar y pryd ond fod bwriad i gael barn yr unigolion am y gwasanaeth yn y dyfodol.

Gofynnwyd os yw'r adran yn rhagweld bod y tîm sydd mewn lle ar hyn o bryd yn ddigon mawr i ddellio gyda heriau'r dyfodol. Hefyd, holwyd am enghreifftiau o'r partneriaid trydydd sector sydd yn cydweithio gyda'r adran. Mewn ymateb, nodwyd:

- Eu bod yn rhagweld bod y galw am wasanaeth am gynyddu dros y blynyddoedd nesaf ac eu bod yn edrych ar ffyrdd amgen i gefnogi unigolion. Esboniwyd fod y tîm eisoes efo grwpiau sydd yn cefnogi unigolion sydd yn golygu fod sawl person yn cael gofal yr un pryd. Ar ben hyn, nodwyd fod yr adran yn edrych ar welliannau technoleg i drio cyfarch y cynnydd yn y galw i'r dyfodol.
- Eu bod yn cydweithio'n agos gyda'u partneriaid trydydd sector fel Canolfan Felin Fach a Tan y Maen.

Gofynnwyd os oes angen canolbwyntio mwy ar waith ataliol er mwyn ceisio dod a'r niferoedd sydd angen gwasanaeth i lawr. Mewn ymateb, nodwyd:

- Bod hynny'n rhan mawr o'r gwaith mae'r tîm yn ei wneud. Esboniwyd fod y grwpiau sydd yn cael ei sefydlu rwan yn mynd i gefnogi'r gwaith hynny ar gyfer y dyfodol.

Gofynnwyd am esboniad beth yw'r rôl y Cyngor a beth yw rôl y Bwrdd Iechyd yn y model newydd. Mewn ymateb, nodwyd:

- Bod y Tîm Iechyd Meddwl yn canolbwyntio ar yr elfen gymdeithasol o'r angen iechyd meddwl ble mae'r Bwrdd Iechyd yn delio gyda'r ochr glinigol. Esboniwyd fod pobl yn medru cyfeirio eu hunan at y gwasanaeth newydd neu yn medru cael eu cyfeirio gan berson arall os oes caniatâd. Ar ben hyn, mae'r tîm yn derbyn cyfeiriadau gan asiantaethau gwahanol eraill hefyd.
- Gofynnwyd cwestiwn ychwanegol yn holi sut mae'r adran yn hysbysebu eu gwasanaeth. Eglurwyd bod gwybodaeth ar mewnrwyd Cyngor Gwynedd a hefyd mae meddygon teulu yn medru rhoi gwybodaeth i bobl.

## **PENDERFYNIAD**

### **Derbyn yr adroddiad**

## **7. ADRODDIAD CYNNYDD AR RAGLEN WAITH TIM AWTISTIAETH**

Cyflwynwyd adroddiad gan Aelod Cabinet Adran Plant a Chefnogi Teuluoedd. Nodwyd fod yr adroddiad wedi'i gyflwyno i'r Pwyllgor Craffu yn 2023 ar y Cynllun Awtistiaeth. Eglurwyd fod Grŵp Tasg a Gorffen wedi'i sefydlu o ganlyniad i'r angen i edrych yn fwy manwl ar y cynllun. Cyflwynwyd canfyddiadau'r Grŵp Tasg a Gorffen i'r Pwyllgor Craffu yn Ebrill 2024 a phenderfynwyd gofyn am adroddiad cynnydd mewn blwyddyn.

Nodwyd fod y Tîm Awtistiaeth bellach wedi ymsefydlu'n dda ac wedi gwneud cynnydd sylweddol yn ystod y flwyddyn ddiwethaf. Eglurwyd fod y Tîm wedi'i sefydlu i geisio mynd i'r afael ar fwch mewn gwasanaeth ble nad oedd unigolion awtistig yn cyfarfod meini prawf rhai gwasanaethau.

#### **PENDERFYNIAD**

- a) Derbyn yr adroddiad.
- b) Annog yr Aelodau Cabinet i ysgrifennu at Lywodraeth Cymru yn holi am arian parhaol i'r Tîm Awtistiaeth.

### **8. GRŴP CRAFFU CYD-BWYLLGOR IECHYD A GOFAL CANOLBARTH Cymru**

Cyflwynwyd adroddiad gan yr Uwch Ymgynghorydd Iaith a Chraffu yn rhoi cefndir ar y Grŵp Craffu Cyd-Bwyllgor Iechyd a Gofal Canolbarth Cymru. Nodwyd mai pwrpas yr adroddiad yw gofyn i'r aelodau ethol aelod i gynrychioli'r Pwyllgor Craffu ar Grŵp Craffu Cyd-Bwyllgor Iechyd a Gofal Canolbarth Cymru.

#### **PENDERFYNIAD**

**Ethol Y Cynghorydd Beth Lawton i gynrychioli'r Pwyllgor ar Grŵp Craffu Cyd-Bwyllgor Iechyd a Gofal Canolbarth Cymru.**